

bu chòir do'n chleas so a bhith air a chluich le cluicheadairean barraichte Dhuiseil. Chuir sinn air bonn cuideachd Buidheann Ruidhlearn Dhuiseil, Buidheanan Dràma Dhuiseil, agus Cròilean an Dà Sheallaidh. Dh'iarr cuideigin buidheann iomain a bhith air a stéidheachadh cuideachd, ach shocraicheadh dàil a chur an so gus am fiosaich sinn tuilleadh mun chleas neònach so.

"Fhuair an comunn so cuireadh iad fhéin a cheangal an dàimh ri comuinn mhór eile, coltach ri Comunn nan Cruithneach, Comunn nan Crònan, Co-chomunn nan Comunn, agus mar sin air adhart. 'Se ar riaghailt-seòlaidh-ne sinn féin a cheangal ri comunn sam bith nach eil cheana ceangailte rinn. 'Se bhuil a th'ann gu bheil sinn ceangailte a mhàin ri Co-chomunn nan Comunn. Phàidh iadsan a' chis a dh'iarr sinn, dà ghini: agus phàidh sinne dhaibhsan a' chis a dh'iarr iadsan, aon ghini. Tha mi an dòchas gum bi ar beachdan an còmhnaidh farsuinn gu leòir gu ceadachadh dhuinn dàimh a bhith againn ri comunn sam bith air na cùmhantan sin.

"Tha fhios agaibh uile nach d'fhuair a' choisir a chuir sinn do'n Mhòd mhór an Dumfries a' chiad duais ris an robh dùil againn. Faodaidh mi a ràdh, gun uaill no guth mór, nach robh duais sam bith eile math gu leòir airson seinneadairean Dhuiseil. Tha fhios agaibh cuideachd mar a thachair anns an rannsachadh a bh'againn an déidh a' Mhòid, mar a chuir muinntir Dhuiseil Mhóir a' choire air muinntir Dhuiseil Bhig, ag ràdh gu robh blas Gàidhlig Chelbhinside air an seinn, agus mar a bha muinntir Dhuiseil Bhig a' cumail a mach gu robh muinntir Dhuiseil Mhóir a' coimhead air na breitheamhan an àite sùil a chumail air an fhear-iùil.

"Le rùn tuilleadh còmhstri agus as dòcha sìleadh fala a sheachnadh tha a' chomhairle a nis a rùnachadh gum bi dà chomunn ann an ath bhliadhna—Comunn Dhuiseil Mhóir agus Comunn Dhuiseil Bhig. B'ann fialaidh a bha muinntir Dhuiseil riamh, agus chan eil e 'na annas dhuinne gun do rinn iad còrdadh càirdeil mu roinn iommhas a' chomuinn so, gun a dhol gu lagh m'a dheidhinn. Mar sin, bithidh an crùn a bh'aca air fhàgail air a roinn, 2/9d do Dhuiseal Mhór agus 2/3d do Dhuiseal Bheag.

"Faodaidh mi innseadh dhuibh gu bheil a nise dà òran agam deas, òran do gach comunn. Cluinnibh an t-séisd:—

Oran Dhuiseil Mhóir:—

Suas le Duisdeal Mhór
Sìos le Duisdeal Bheag
An strì no sìth am fagus oirnn
Cha tainig iad 's cha tig.

Oran Dhuiseil Bhig:—

Suas le Duisdeal Bheag
Sìos le Duisdeal Mhòr
Ge b'e raon 'sam fiach iad ruinn
Bheir sinne dhoibh an leòir.

"Bu mhath leibh, tha mi cinnteach, fios a bhith agaibh dé an comunn a tha mise mi fhìn a' dol a leantainn. Matà, ghabh mi cuireadh a fhuair mi gu àite a ghabhail mar chiad rùnaire comuinn ùir a tha gu bhith air a stéidheachadh an ath bhliadhna, Comunn Gallda Chamuschrois."